



西村集序

莊周有言曰刻意尚行離世異俗高論怨誹爲元而已矣此山谷之士非世之人枯槁赴淵者之所好也語大功立大名禮君臣正上下爲治而已矣此朝廷之士尊主疆國致功并兼者之所好也夫仁義忠信以爲學出則朝廷處則山谷人徒以爲爲元也以爲爲治也而不知元之未始不爲治治之未始不爲元也故曰夫人幼而學之壯而欲行之行則君子欲之然能必其行乎哉欲之而不可得則其學猶是也是故亢而不爲倍治而不爲矜則固世之所謂通儒者已西村先生自少好學

於書無所不讀卓然舉大義不掇拾以爲文辭而尤攻
於史學於古今治亂之端官府政事物名數紀縱橫上
下指掌論說莫不有肯綮歸宿以爲學者宜如是而不
屑以求一試聲名隱然起東南成化中三原王公巡撫
江南以百姓之利病坐先生而問焉則歷歷語所以退
復疏其事以道諸所宜更置公歎曰子之才可以當一
面乃今得先生所著述自詩歌文辭之外其與旬宣大
臣臺部諸使郡縣長吏往復論白及於政事者居其三
之一焉莫不適當變盡利害里閭常布之所推遜而無
有選擇縉紳大夫之所以嚮用致理而不能舍去者皆

是也則所謂通儒者非先生歟吾吳中經生學士講求
時務水利莫先焉決塞變遷大要委諸海而已殆難按
迹而求復其舊也職方禹貢以來互爲援据夫人而能
之舉而加諸水則悖矣不然則又吏于茲土者大發在
官之蓋藏而以畚鍤從事壞廬舍弊腓脛掘地數十里
引旁流內其中而曰水去矣明年不幸而恒雨曾不能
損水之分寸其如浮而不實費而無功何哉至讀先生
論水利書首以謹隄防其大法有司者使田者因地執
豫爲防以擬水於是立之表以程其功課之藝以益其
厚貸之粟以傳其力夫民水也大爲之坊民猶踰之况

不爲之坊乎裕民成賦之道未有能行之者其有用之
學可以畫一而論也余生也晚不獲操几杖以從讀其
書而每有感焉先生旣沒其冢孫進士臣衷其稿爲集
余曰是集也約而達勤而節謀而有徵不獨論水利若
是矣可以傳也余所嘗欲見先生所著禮纂若干卷者
尚不在集中先生史氏諱鑑字明古吳江人學者稱西
村先生吳文定公表其墓家世行實具可攷也
賜進士第奉
勅提督南贛汀漳等處軍務都察院右副都御史邑人
周用書

西村集目錄

卷之一

賦

望泮樓賦

結微賦

惜愍賦

卷之二

古詩

臨清軒

寄許克大

遊寶石山有懷舊遊諸友

懷古二首

丙午歲予初度題像



送梅刑部郎彦常

烈風七章

過梅花道人墓

卷之三

古樂府 辭 歌 行

贈楊君謙古樂府一首

殺虎詞

靈芝歌

畫馬歌

秦淮歌

題沈啓南畫月下杏花

澉浦楊將軍歌

狐綏綏

觀潮歌

天驕子歌

秋林會友圖

門有車馬客行

許子厚約遊石湖謝不赴

卷之四

五言律詩

排律

絕句

六言絕句

七言律詩

排律

絕句

聯句

詩餘

中秋聞諸弟宴集湖上有作

蕉窓

竹房

送漁隱母舅

梅軒

樂清

和呂別駕九日登姑蘇臺韻

一鶴

謁徐武功墓

夜宿奉先寺

與汝其通觀錢塘江

將遊金陵夜泊震澤

經瀨水

杏村夕照

元日

立春日

哭林侍御二首

題旌功廟

和姚公綬宴浦氏寫山樓韻

壽司馬太原公七十

輓禮部倪尚書三十韻

輓吳都督四十韻

懊儂曲

前溪曲

題扇

題萱二首

清暑處

即景

題扇

舟中偶成四首

次進士馬中錫吳淑遊京師西山韻八首

分得太湖送鄔用明還鄞

贈金本清舍人

寄震澤道士沈長春

和秦太守廷韶遊虎丘韻

吳元王招賞牡丹以無都扶圖呼為韻

聚遠樓

遊勝果寺

于府尹景瞻張太守靖之寶峯宴集

松陵夜泊

送嵇揮使還長安

舍弟鐸病起得子偕正夫往賀

送人遊維揚

登吳興慈感寺閣

曹顥若載過訪以詩贈別

還家有作

和張子靜

宿靈隱禪房次劉邦彥十二韻

登紫虛閣

寄吳一齋姻家二首

題陳希夷睡圖

寄吳鳴翰湖上一首

題扇

寄友二首

醉題西朶壁

十二月古中靜以扇索詩

題和靖觀梅

題許子厚扇

可閑

題啓南松陵別意

偶成

斷橋分手

題澄上人畫竹

諷陸廷美

塞下曲

吳廷暉水榭

海鹽張方洲太守遠慰予室燬臨行贈此二首

和答吳廷暉三首

葵花

鹿葱

寄杭州友人

秋日郊行

和汝行敏舍人二首

寄吳禹疇一首

送顧儀賓赴石城王府花燭二首

大石聯句四十一韻 合并聯句

小鴻村聯句 賞克振弟牡丹

登保叔寺湖光閣 賞牡丹

壽楊經七十一

卷之五

傳

桂彥良

姚善

呂震

尹昌隆

平思忠

卷之六

誄 祭文 行狀 墓誌銘 墓表 蓋石文

淵孝先生誄 祭董仲舒文

祭武功伯文

工部管繕清吏司員外郎吳君行狀

故中憲大夫南安府知府汝君行狀

繼母朱氏行狀 李夢陽墓誌銘

張子靜墓誌銘 沈希明墓誌銘

亡妻李氏墓誌銘 亡妾叔蕭氏墓誌銘

二殤孫墓誌銘

桐村齋室記蓋石文

明故永寧縣主簿諸君墓表

卷之七

序記

司馬年譜序

送李員外詩序

吳江曹氏復姓序

吳江張氏族譜序

挽歌序

大明文約訪采序

誅巫序

序侍御劉公愍灾

同里社學記

菊花記

榮壽堂記

卷之八

書雜著

上少保王相公書

與吳匏庵書

辭縣令請鄉飲書

與陳玉汝黃門書

論郡政利弊書

上中丞伯相公書

龍墳誌

相喻

吳江水利議

運河志三首

革姦對

宣宗皇帝御書贊

讚言

自贊

題沈啓南詩畫

題司馬侍御與祝秀才書後

題錢塘記後寄吳原博

僧巨然畫趙秉文跋考

附錄

墓表一首

登小雅堂五首

登墓一首

西村集目錄終

西村集卷之一

賦

望泮樓賦

為何中丞賦

長樂郡
振華西
諸子也

會稽名邦新昌望邑沃洲前陳天姥左翼奕奕學宮多
士斯集猗歟先生世家其側其側伊何厦屋渠渠于寢
之西爰樓以居匠石掄材史皇畫圖因揆地之不足乃
借天之有餘重欄瀉注八窻洞虛外靡飾乎丹牖中惟
藏乎簡書至若風和日美冬溫夏涼天宇朗豁雲容歛
藏先生乃我爵弁胥葱蘢叶被純衣揄纁裳或登左城
或由右平叶唯意所適徘徊翺翔既徒倚以流睇復招

搖而永望偉宮墻之岌業圍泮水之汪洋左涵右滄前
疏後闕叶如月之弦如環之玦泓渟淵澹汨隱蕩瀟白
虹之來流行青鳥之徵羸發忽掀風而觸石舉灑雨而
跳沫叶其旁則有蘭杏棠棣叶樅桂楠櫨璀璨榮掩
丹交柯其中則有蘋荇繁蕪芹藻離蓀應風靡靡掄水
田田若夫禮殿東建講堂西抗案石崇基疏峯剝障憲
星宿而經營法陰陽而背向其為形也瓌譎豐隆其為
勢也睽眾宏壯飛梁搏負而蜿蟺列桶參差而矯伉丹
青煒煌光彩晬晬蛟龍騰而天矯禽鳥飛而翺翺靈異
竒怪莫可名狀又若廊廡對列黌舍類區直如矢棘張

如羽舒循循如接武纍纍如貫珠莫不俎豆茲設詩書
是儲或先賢之所從祀或弟子之所攸居乃有睨儒敷
教髦士窮經爰游爰息允脩允藏或處于室或造于堂
校黷肄業問疑啓蒙叶分剌節度割弊毫芒當春服之
既成時夜漏之未央詠歸兮其行濟濟叶誦兮其聲洋
洋是故月課其成歲獻其良魏科甲第後先相望器之
為瑚璉才之為棟梁任方隅者為岳牧贊政化者為公
卿叶罔不由此宮而出豈不為賢才之大方也哉若其
行告報節春秋筮從日戒群寮叶命條為酒宿賓為期
叶至日東方未明辰次于子大夫朝服其袂有移至于

廟門蕭蕭戾止博士相之隸此羣士視殺既畢概噐斯
已乃馨黍稷亦饗羊豕水物具登澤鮮備有叶血腥上
同乎古初歆孰聿兼乎人鬼遂乃燿火舉牲體升簋簠
饌邊豆陳工祝致告佐食駿奔于是大夫即位庶士綴
行爵解具獻燔炙畢從叶馨香苾芬光景輝煌爾乃塵
藩舉升龍翔祝具擊軒縣鳴鼓鍾鎗鎗金石鏗鏘絲竹
繁而不亂匏土剝而不傷迨升歌之一出衆音比而低
昂是皆宣中和而感神人竅幼眇而調陰陽又若華冠
紛羽籥入行八風舞六佾或俯或仰或徐或疾奮袞翻
翻頓趾秩秩泛而不浮沈而不窒張而不縱歛而不抑

氣洽形和神暢志得于是神具醉止祝告利成叶祭之
明日尋繹于祊維道羸之不已求神在之無方是知
聖朝之所以尊師重道豈徼一時之福報一世之功也
至若賓興之期蜡通之祀因民聚之時行鄉飲之禮或
叙賓維賢或正位以齒欲使民尚德而敬長觀化而興
起于是主人謀賓介誓有司戒且肅敬甚卑拜辱于館
拜至于階叶賓席南向牖南是基兩階之上主阼介西
有降必從有洗必辭主人獻賓薦脯設俎叶濟肺興加
啐酒告旨乃酢乃酬百拜成禮獻介如之遂及衆賓衆
賓之長升者三人坐祭立飲肆席其西叶若夫位于堂

下亦辯薦而必均猗一人之舉禪助主人而樂賢叶有
遵維公大夫實從公席三重位于賓東大夫再席主北
西容維升降與獻酢繫介賓之是同乃有樂正先升羣
工次入歌之三終比以二瑟依特磬以為聲吹笙和而
應律遂乃間歌雅什合樂風詩嘒大音之猶在美王化
之始基然後正歌備工告悉主人降司正陟奠禪飲旅
酬畢徹俎說屢揖讓就席爵行亡算樂奏唯欲叶樂湛
無荒醉止不失及夫禮既成賓辭出陔夏奏牘聲作叶
應偕鳴雅合節叶主人拜送以明有卒逮夫莫春之月
合射學宮祇用觀德亦以和容飲禮倡其始燕禮衍其

終其為職也則有賓而無介其為樂也則釋雅而歌風
采侯既張昭質攸設特磬徙東其篋捷業叶司射適堂
袒而遂決有司請射三耦維剡彘弓既殼羽鏃斯棘景
如星流聲如帛裂叶有旌負侯樹羽幢幢諾聲振乏唱
獲奏公釋者報算委于鹿中用祈爾爵取飲于豐獻獲
于侯乃用折俎獲者負侯北面拜受叶初適右介終中
亞左叶遂當侯以三祭立既爵而竝後叶維大夫之與
公士亦拾發而為耦叶揖皆進以當物取乘矢而順羽
爾乃樂以騶虞應以縣鼓采蘋間之其終咸五越三射
之既周辯受酌而旅語恍若子路執弓序點揚觶而相

與習于矍相之圃乃知先王之教所以習容儀知賢否
叶可以文可以武非以之逸時而尚齎也曠千古而難
兼乃一樓而畢覩匪慈母之三遷由擇居之得所于是
朝之縉紳鄉之黃耆咸喟然而稱若出一口曰夫樓觀
者所以廣心目宣鬱滯暢精神覽風氣史不勝書文不
勝記然求如我望泮之飶道醉德漸仁浹義慕聖思賢
育才遊翫是殆猶霄壤之殊固不可甲乙而第然而先
生憮然若驚矍然若悸思其所未能不自以為至也客
去乃援琴而歌之倡曰日月光華兮不遠伊邇其來無
終兮其被亡已少歌曰明明在天兮人皆見之運行有

常兮匪獨我私樂此終吾生兮又將何求

結微賦

送吳脩
撰起復

繫青春之獻歲兮和氣周浹而流行白日昭晰于上天
兮微風動日而發生惟美人離此故居兮將騰駕夫遠
道榜餘艗之長舟兮濟江湖之淼淼紛賓從以馳騫兮
咸出祖乎河之梁蒸蕙蘭以為馥兮精瓊瑤以為漿羗
升歌而比竽瑟兮音博衍以䟽越獻羽觴而旅酬兮行
徘徊而未發睠回視夫舊鄉兮情鬱邑而內傷念王
事之靡盬兮懲懷與安之敗名叶忽交手以前行兮曾
不能須臾處也望雲旗之透蛇兮順埃風而輕舉也經

中原之千里兮覩邑野之蕭條喟憂心其忉忉兮哀民
病之曷瘳叶凌呂梁之洪濤兮指天津以徑度日皇皇
而不暇息兮恐年歲之遲莫曼流日以遙睎兮偉皇
都之赫戲騰王氣於中天兮儼神明之所居叶旦將入
覲于六儀兮宿澡祓而致齊叶聞鸞聲之將將兮起視
夜之何其戴切雲之高冠兮帶長劍之陸離被夜光與
明月兮檻椒蘭以充幃當闕門之未啓兮聊假寐以
潛婧魂營營而靡適兮豈斯湏之忘乎敬恐雞人之唱
曉兮命天閭其啓關爛煌煌之遮燎兮紛炫耀乎崇班
風冷然而轉鑪香兮芳菲菲兮其滿殿奏中和之韶樂

兮鳳翔鳴于霄漢望重瞳而舞蹈兮折璫枝以爲獻亮
君用之不乏斯兮冀少伸其慕戀惟玉署之清華兮在
人間而天上備顧問而獻納兮掌絲綸之密命叶蓋將
儲將相于禁林兮豈辭藻之爲優邈紫霄而容與兮凌
玉清以逍遙叶啓北扉而鄉浴室兮紛召對以無時總
史筆之婉微兮發金匱以紬思誕帝心之簡在兮秉
化權其有日也沛德音之浹行兮周四海而靡息叶也
勒金石而播聲詩兮又何古人之不可及叶也嗟予生
之賤且遠兮固幽獨而傷懷叶也苟願言之不孤兮雖
槁死山澤其何悲也亂曰黃鵠一舉翔千里兮其羽可

儀絢且美兮蔚羅高張莫吾以兮下視鶉鷄栖棘枳兮
其鳴咬咬其飛靡靡兮顧瞻徘徊不知所止兮高下異
勢固其所兮匪不爾慕不可易處兮翩翩獨征無疇與
兮庶幾永日以安所受叶兮

惜愍賦

送莫景周赴
新昌訓導

秋風蕭條夕起兮白露變而為霜原野寂寥無色兮草
木為之不芳嗟夫君去國而遠逝兮將往遵夫行路蹇
徘徊而不進兮步十舉其九顧望皇居而不見兮涕
浪浪以沾衣情侘傺而莫釋兮何須臾能忘之繫願忠
而慕義兮冀少伸其微志胡壅遏而不通兮曾不能以

一試彼蕙纒與蘭佩兮宜日切乎君身忽棄捐于山

谷兮豈將惠夫南之人覩江湖之浩浩兮紛日夜而東
流駐駟馬于山臯兮乘舸船而下浮去故鄉之日遠兮

路險巇而多梧濟錢唐而上稽山兮踈陳辭于神禹慨

聖功之無間兮民日用而至今仰昭回于上天兮儼光

華之照臨入浦江以南徂兮眷新昌之所治俗儉嗇以

憂勤兮乃風氣之所會山巖崒以多雲兮晝冥冥其若

雨林幽深以行迷兮疑非人之所處虎豹穴處而咆哮

兮猿狖跳梁而嘯啼溪谷嶄巖而險阻兮草莽委被而

萋迷苟衆芳之不乏君用兮雖僻遠其何悔也恙好

脩以爲常兮矢初心之靡改也昔賈誼以材見嫉兮卒
遠竄於長沙桑何切終焉宣室之召對兮語前席而忘罷
叶苟其言之見用兮身不必在乎 君側繫貴寵之與
賤疏兮諒由命之所出惟定心而廣志兮寧時俗之能
從擣茲媚以潤身兮豈將愁苦而終窮亂曰鳳凰集于
高岡兮世已見其文章固非時俗之所好兮然共以爲
嘉祥托靈風而上浮兮俾翱翔于 帝鄉

西村集卷之一

西村集卷之二

古詩

臨清軒

達人尚幽勝葺宇臨清流清流宜濯纓深渚可容舟周
流元不息晝夜恒滔滔叶微風蕩生瀾木葉下驚秋流
響歸空房浮光映高樓夫容綠極浦杜若被芳洲於焉
事栖息駕言聊出遊榜舟張水戲擁楫和長謠叶犀燃
窮怪物蓮折傾龜巢叶鳴更出靈鼉滕予躍文魚叶境
勝良自愜慮淡信無求惟應素心人來此共逍遙叶

寄許克大

春風布寒廓萬卉咸華滋灼灼滿中園婉綠還抽緋夫
容抱幽獨兀兀空江湄誰云發生晚無乃未逢時一朝
秋節至盈盈花滿枝回看艷陽質孰與孤高姿時來即
成就晚達奚足悲

遊寶石山有懷舊遊諸友

山靈謝逋客陰雲故彌漫叶淫雨日潺潺朝來稍停倦
出門望西湖如見故人面眷茲寶石峯樓臺憶曾館叶
老僧擁破衲松下一笑粲叶興懷舊遊者零落已將半
叶凄然不成歡臨風發長嘆叶主人遠追隨况乃集文
彥共言春將歸與子同飲餞徒倚被層闌逍遙寄華燕

暢心風振衣屬耳泉鳴澗無端霧雨霏涸更益零亂叶
初疑水氣浮復訝山林暗叶佳景能娛人過眼無留盼
叶一適乃云可得喪非所患叶嗟彼牛山遊胡為泪如
霰

懷古三首

晉氏昔奔潰叶中原亂如沸區區廣陵相亦欲盜江介
叶不有顧元公也顧榮禍亂斯其始去聲既成揮扇功終定
繼牛位盛德百世祀胡為忽云廢古墓逼耕犁荒祠雜
祆厲過者豈無人誰能一留睇遙遙千載間哀哉日陵
替

陵替信有由好古無其人請看王侯墓十樹九無存

謝公謝應芳字子蘭避地士栖栖不遑寧叶時無戡亂才

干戈日相尋叶九原今不作盡然傷我心叶上書告縣

令縣令周彝臣祭掃除淫昏叶碣石永其傳周伯溫撰并書栽梧表

其名叶同時文章家頌咏費敷陳廢興如循環旋復委

荆榛

荆榛易永久百歲等湏臾守令檢文法長年惟簿書一

為高世談舉俗笑其迂纍纍道路邊誰復責斯墟朱君

志好古覩此興長吁輯錄匪求名庶幾能者湏遺詞幸

見復廢墓未應蕪雖非令式載允為名教圖君其加勉

旃慎毋忘厥初

丙午歲予初度題像

自我得爾來忽忽已三載憂樂不相關貧病安能浼茲

辰遇初度舉酒一相灑我貌日就衰爾顏長不改過此

復幾時應知愈不逮觀者問為誰曰我咸疑給惟餘舊

親識追想為爾拜茫茫天地間歲月不相待終當委運

去誰亡復誰在謂是無所知言非亦何解一笑兩茫然

浮萍渺滄海

送梅刑部郎彥常

臨江理舟楫駕言辭故鄉故鄉非不安憂君未能忘

握手一長嘆出門何愷忼所遇無險夷行行盡周行老
驥志千里游子懷四方豈如轅下駒局促徒悲鳴叶
聖朝雖致治庶事未盡康江南多苦雨江北多愆陽遺
民日啼饑已空糟與糠救荒豈無政何能補流亡秋高
胡馬肥徵師守邊疆行者犯鋒鏑居者供餼糧遣使出
監護冠蓋恒相望未聞奏捷功聲勢徒張皇君昔在郎
署明刑凜秋霜仁聲又洋溢遠追于與張茲行定高擢
指日登巖廊願弘濟時具拯斯昏墊民叶莫以合燭故
愛此東壁光丈夫得行道離別何足傷

烈風七章閔子

烈風亡停柯凝霜變青草年命苦相催壽者何其少惜
哉延陵孫祖謝無乃早孤兒未能行寡妻年尚小含凄
教詩書灑淚相携抱矢心期自持有如白日暎
白日出東北莫向西南流誰知貞烈名亦應宮掖求郡
縣苦見迫強命登行舟慟哭與兒訣相見永無由生當
長戚戚死當長悠悠

悠悠復戚戚哀愁無終極有 詔屬藩王隨例之封國
寂寞掩長門彷徨思故域丘壟不復知孤兒長在意夢
中或見之覺後那可得相離三千里安能來母側
母側兒不來叶兒悲亡已時升高望母居路遠莫見之

浮雲暗邦國遠樹含悲颺白日忽西昇景在桑榆期顧
瞻起長嘆吞聲泪漣漣

漣漣竟何益誓將求四方崎嶇指東廣迢遞轉西江叶
行行異川陸冉冉變温涼層巒翳雲日巨浸騰蛟龍叶
畏途良險艱十步九彷徨誰謂君門遠萬里終能通

叶陳情叩閣陛昧死干賢王

賢王任孝理下令許迎歸誰知病已革不絕僅如絲籲
天代以身剖股特作糜張目忽能視言動如有知瀕死
得一見驚號更相持哀聲徹天地旁人亦酸悲

酸悲復嗚咽哀哉終殞絕本圖得生還豈料是死別銜

哀理歸柩水舟仍陸轍江湖多風濤溪谷深雨雪間關
幾千里終焉祔先穴山高亦有崩水深亦有竭孰知哀
慕心終天不可滅

過梅花道人墓

在嘉興武塘后

問津武塘下攬衣獨吟行裴回古道旁纍然見孤坐荆
榛窟狐兔牧豎時來登橡樹半亡枝曲池猶未平哀哉
梅花庵一仆不復興空爲水墨蹤允爲後世程高風董
巨間不得名丹青古碑無文章但銘卒與生生前徇名
殺豈樂浮屠名時非有深識季世多兵爭愚人信因果
庶幾保其形同時富豪家厚葬侔山陵毀盜殆無餘遺

西村集卷二
五
骸縱復橫珠柙去已久蔓草來相縈如何一杯下晏然
亡震驚取重亮在人信非山水靈采芳薦清醕日落風
悲鳴遥遥望遐躅感歎有餘情

西村集卷之二

西村集卷之三

古樂府 辭 歌 行

贈楊君謙古樂府一首

去古日云遠雅樂久沉淪桑間與濮上靡靡多哀淫叶

楊君媚學子高志故不羣叶一聞世俗音謂非吾所湛

叶冥心太古初識樂得其真律呂既調協五音和且平

叶咸英與韶濩曠世今再聞叶豈惟以自娛擬將獻吾

君奏之 郊廟上庶以和神人

殺虎詞

城西之山舊無虎草淺林疏少依阻白日咆哮忽見之

橫行食人難指數官兵捕虎爭負戈上下陵谷交張羅
一虎跳梁忽驚潰何況衆口騰其多怒視眈眈猶負嵎
山民櫻之椿以及黃斑紛披血膏野相與屠戮殘其軀
嗚呼養兵資禦侮見虎何爲怯無武龍沙茫茫天四垂
走馬胡兒猛於虎君不見肉食乘軒將門子遇敵幾人
能致死

靈芝歌

靈芝生叶粲若英叶來百福世其昌解一靈芝生光且奕

慶斯鍾象乃德解二靈芝生叶銅池中叶和致祥壽無疆

解三靈芝生氣之粹配慶雲象華蓋叶解四靈芝生受天祐

祐維何錫爾祚解五靈芝生何輪困子孫兮宜振振解六

畫馬歌

房星之精化爲馬肉駿連錢滿天下世俗寧知驥與駑
善相方臯一何寡君看畫馬自有真能通相法方入神
驪黃牝牡不足辨天機內解斯其人騰驤飲齧逐水草
筆端幻出龍駒島雄姿矯矯長風生逸氣稜稜飛電掃
老眼摩挲忽驚起便欲驅之涉長道君不見曹韓已往
不復生吳興死後無丹青天閑龍媒十萬匹誰能起之
圖爾形

秦淮歌

西村集卷三
停君金叵羅聽我秦淮歌長江西來幾千里沿洄直入
臺城裏浮青蕩綠南北流至今猶號秦淮水秦淮之水
能容舟秦淮之上花滿樓美人卷簾垂玉鈎太白仙人
清夜遊酒酣乘月往石頭棹歌渡淮水倒披紫綺裘英
風撼五岳豪氣隘九州迺來四千四百九十五甲子無
人繼此移山倒海之風流水光依然月如故斷雲零落
令人愁豈無清歌與美酒與子碌碌誠堪羞我歌秦淮
歌送君秦淮去城西酒樓在何處主人今非舊孫楚且
須痛飲歌達曙達曙歌醉方寢笑壓吳姬股爲枕滿身
模糊覆宮錦明年我亦泛秦淮手解金龜就君飲

題沈啓南畫月下杏花

我昔慶雲看杏花春雲厭樹埋晴霞無端風雨中夜作
狼籍滿地同泥沙十年蹭蹬不復見無乃天意於吾賒
老南忽往花正好兩株繁華對晴昊白日苦短看不足
更向良宵事幽討月明照花花滿地恍若清波漾文藻
夜深露下花更佳汗濕娥眉淡於掃巫山神女朝夢雲
洛水靈妃夜當道知君好事不可當遶樹吟行被花惱
詩成得意難具陳片紙再與花傳神品高意遠迹逾妙
反覺樹上花非真須臾喧傳動城郭借看累月紛蹄輪
君不見虎頭曾圖瓦棺壁觀者雜還輸其珍老僧老僧

西村集卷三
收拾去且莫出示無錢人

澉浦楊將軍歌

楊將軍才且武作鎮邊城勇貔虎海波滄溟南風生日
夜登陴按樓櫓揚兵耀武天欲傾驚雷破山震輦鼓震
輦鼓縣旆旌紀律肅部伍精止如山峙來如風行戰無
前陣攻無堅城倭夷遠竄海道平坐令四野無交兵黎
民按堵不見寇盜驚楊將軍好士無與倫胡公老去蕭
生死康生羅之爲幕賓倚馬作露布揮戈淨風塵謂予
好奇節論交握手意氣親平生慕魯連輕世肆志不羞
賤與貧射書直欲諭燕將蹈海不肯爲秦臣方今三邊

用師旅我將持書告當宁佐君徂征固吾圉功成不受
茅土封笑指雲山是歸處

狐綏綏

中使與妖人相爲表裏毒流海內言之可爲於邑司馬
太原公奮不顧身抗章上陳有犯無隱卒能感悟君心
誅戮凶黨以謝天下斯正孟軻氏所謂一正君而國定
者也因托物引諭以頌豐功盛德之萬一云

狐綏綏鬼爲侶夜嘯叢祠作神語戲舞跳梁從社鼠雲
凝月黑天冥冥尾搖陰火光如炬興妖作孽天不知指
顧灑灑雷風隨社公土伯望塵拜白望橫行九州界萬

民皇皇訛且驚市肆書閉空其城群巫四出假神命搜
括逮捕何縱橫巫言神君去天咫尺民命由來主張是神
今下界來求珍敢有不共隨殛死明月珠夜光璧瑪瑙
之盤大逾尺婆律旃檀蘇合香珊瑚瑯玕亞姑石此物
何由在山澤巫傳神言許輸直厚估高評動千萬破產
傾家責難塞黃龍大舶行迷津櫃帛囊金無紀極江南
眞宰哀民窮封章上奏 天皇帝天教六丁攝狐鼠貫
以大索囚鐵籠斷狐頭斫狐趾磔鼠之皮肆諸市妖巫
殄滅厲鬼亡四海清寧萬邦喜眞宰之功一言耳回格
天心正人紀

觀潮歌

雞聲喔喔天未明大家盡說觀潮行騎輿徒步相迨還
袷服靚妝街市盈江頭日高潮未生秋風獵獵笳鼓鳴
美人狎坐臨前楹嬌歌宛轉調鳴箏須臾謹呼笑相指
一線遙從海門起潮頭崛起高于城萬雷齊轟駭人耳
排山倒海天欲傾回波激射奇態生兩陣合戰兵力勅
戈甲晃晃秋空明群兒弄水夸巧捷擎旋蹙踏如浮萍
人言潮來信有時我言潮來不可期君不見胡兵營沙
人有待潮乎此時信何在徒勞日後來不休萬古莫洗
錢唐羞

天驕子歌

題胡人
驅馬圖

天驕子自矜剽勇無與比龍沙茫茫千萬里隨畜轉移
無定止草盡水枯行復徙天驕子繁有徒朝姑衍莫孤
奴弢弓箭氣甚都前超駃騠後駒駼什什伍伍駐且
驅羣中五明骨相殊銀蹄玉鼻玄龍軀番王示閑暇攬
轡野踟躕黃金比余裘白狐呼鷹賈勇決雲起駕驚垂
翅聲哀呼胡姬之婁非漢姝雙椎壓肩編背珠茜紅韋
襦下過膝並馬笑語相邪揄天驕子人識爾形誰測爾
情贊華已死胡壤不生斗帳起塵久寂寂忽見此圖雙
眼明雙眼明長嘆息誰能驅之歸漠北汛掃腥羶淨區

域戍卒番休事耕植

秋林會友圖

青山巖從凝紫霞飛泉如虹飲渥注楓林接葉紅於花
上有鸞鶴下麇麇玉樓珠箔仙人家仙人顏色長美好
瑤池桃花得春早門前石楠秋葉香滿地綠雲風不掃
有客來遠方驅車涉羊腸車聲到門止揖讓升高堂高
堂奕奕凌雲漢瑤爵金盤青玉案華燈煌煌照宴嬉漢
女爲生洛妃旦浮雲不行天欲低回風動地飛花亂悲
歡離合樂未央起視明星夜將半夜將半舞且歌發激
楚奏陽和巧笑兩頰生微渦蛾眉曼睩光騰波平生樂

事良蹉跎對此轉覺哀情多明朝忽驚雙髮皤其奈流光如箭何

門有車馬客行

送張承差歸陝西

翩翩南回鴈哀鳴向秦飛道路非不遠乘時安可違門有車馬客駕言歸故鄉執手難久留且復少裴回叶關中天下險山河盡城池云胡失保障匈奴忽來茲傳聞入北地民物多傷夷豈無霍去病能不以家爲胡來閉城守胡去揚兵追如何秦隴間到處成瘡痍憑君謝諸將全軀豈男兒努力事掃除勿令蔓且滋古來御戎狄重在干城才叶請看麒麟閣功臣亦人爲

許子厚約遊石湖謝不赴

杭州擅西湖烟花瀰漫天下無石湖處吳苑佳麗亦足雄吾蘇青山巖從抱湖涘吳臺越城兩荒址紫薇舍人天上歸乞得天書賁湖水湖水東西流世人相續遊古人不可見今人來不休古人今人日更改湖上青山鎮長在梵宇琳宮幾廢興湖波依舊東流海許君約客爲春遊綉被錦帆青翰舟攀巖踐穴肆探討滂洄擊汰相夷猷山嵐湖淥可手掬大笑拂入杯中浮舉盃仰天作鯨吸沃漑胃腎資冥搜時時得句輒歐出錦囊錯落驪珠投莫歸列炬照湖上水波涌沸魚龍洄蹇余汲汲塵

中走與約誰知此言負想像清歡寤寐間側身西望長
搔首作詩聊寓不平鳴有命重遊尚須後

西村集卷之三

西村集卷之三

